



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 7

## Congress MP Rahul Gandhi-i Wayanad nung ki 100 sütsüsü nangzük

## Hamas lenir tepsetba ajanga ceasefire atema jembiba nung meyaritsü



VOL. XXI ISSUE NO. 291 (ADOK 291) DIMAPUR KÜPTOKNÜ (SATURDAY) LUROI (AUGUST) 03, 2024 ₹ 5.00

## WSH-i timi angatetteptsü ayongzük

**Dimapur, August 2, 2024 (TYO):** NSCN/GPRN (Khango)-i KKB Rulho nem tasüba temerenshi agütsüba atema aoksar aser magizükter ta Western Sümi Hoho (WSH) aser parnok kübok aliba teloktemi metetdaksüogo.

"Saru meshiba dak sendakba nung mangatettep adoka rara aser amokmeren madoktsüsü. Anungji onoki NSCN/GPRN (Khango) dang tasüba temerenshi agüja aliba meyipa agitsü aser olemtep ajanga saru ken o angatetteptsü ayongzük. Onokisa Angami Youth Organisation (AYO) dang ajak ajangzüktsüsa olemtep tajung alitsü ayongzük" ta ta Media Cell, Western Sümi Hoho-i sangdong ka nung ashi.

AYO-i NSCN/GPRN

(Khango) den amalitep malitsü ta sangoktsüba sülen NSCN/GPRN (Khango)-i tekümdangtsü ashiba den AYO kübok contractor temi tanga district tem nung mapa inyakba anentsü aser osetsüset agientsü tetuyuba agütsüba atema tebilemtsü abener. Iba inyakyim ajanga yimjung tensa raksatsü aser asenoki terenlok aser azükarutsü atema inyakba nung tetsükdaksü ajurutsü, ta WSH-i ashi.

Asenok ajak longjemer timi angatetteptsü lenmang bushitepedi aser asen state nung tensa süngjema aliba raaksatsüsa mapa meinyakli. WSH aser onok kübok aliba telok ajaki nisung ahak dang Naga nunger ajungtsü atema aremzüktepa inyaktsü mepishir aser asen tarutsü ajungtsü atema inyakdi ta Western Sümi Hoho-isa metetdaksüogo.

## Nagaland sorkari SBI General Insurance den MoU nung sign sütep

**Kohima, August 2, 2024 (TYO):** Nagaland sorkar aser SBI General Insurance tsünga Honibarnü Disaster Risk Transfer Parametric Insurance Solution (DRTPS) mapa tenzüksü atema sign sütepogo.

DRTPS ya küm asem atema asütsü aser iba atema tanü disaster management insurance nung sign sütep.

SBI General Insurance aser Nagaland State Disaster Management Authority (NSDMA) tsünga Memorandum of Understanding nung sign süogo aser iba nung küm asem atema insurer-i Rs. 150 crores enoker aser state sorkari annual premium Rs. 4.20 crores (Rs 12.60 crores) enoktsü.

"State sorkar aser SBI General Insurance tsünga DRTPS atema MoU nung sign sütepogo. India nung iba disaster management insurance tenzükba ya Nagaland mezüngbuba lir" ta CM Rio-i osangbener dang ashi.

"Iba insurance ya Nagaland ajanga atema lir aser sorkari insurance premium agütsüsü aser 2024-2027 tsünga langka tamajung atalokra insurer-i asenok yaritsü" ta pai ashi.

"Iba maparen tiptema inyaktsü imlar aser districts ajak nung public-i yaritepa mapa timi inyaka aotsü maparen tenzükba lir. Tzümetzüng, tsüngsarusa, anentsüh, kiojen, tsünüsenbongtsü raksaba amala nung teyari angutsü. Nagaland

ket nung rongsen mali anungji iba insurance ajanga asenok kümzüka ayutsü" ta pai ashi.

NSDMA-i taruba küm asem atema Nagaland nung Disaster Risk Transfer Parametric Insurance Solution mapa inyaktsü.

DRTPS ya Nagaland sorkari tang mezüng atema mapa tenzükter aser iba risk transfer scheme nungi angazüka tanga state temia bentshia aotsü imlar ta NSDMA-i metetdaksü.

T s ü n g s a n g - m o p u n g melenshiba mapang ka nung Disaster Risk Transfer Parametric Insurance Solution (DRTPS) ya kanga tapet lir. Iba scheme ajanga senotsü teyari agütsüsü ta NSDMA-isa ashi.

## NBSE-i higher education scholarship atema metetdaksür

**Dimapur, August 2, 2024 (TYO):** Department of Higher Education (DoSE)-i higher education kaketshirtem indang scholarship atema osang ka metetdaksüogo.

Ministry of Education-i shidi züluba ama Pradhan Mantri Uchchar Shiksha Protsahan Central Sector of Scholarship for College and University Students (PM-USP CSSS) atema National Scholarship Portal lapokogo ta DoSE-i ashi.

Higher Secondary School Leaving Certificate Examination (HSSLC) nung Top Twenty nung züngsemba kaketshirtem aser tsüraburtem küm nung Rs 4.5 lakhs income angurtemi iba scholarship agitsü akok.

Kaketshirtemi National Scholarship Portal (<https://scholarships.gov.in>) nung tenüng agütsüsü akok aser school tekolaktemi iba scheme ya kaketshirtem nem metetdaksütsü mepishir ta DoSE-isa ashi.

## Chuchuyimpang yimdak Tsüngremmung benjong amung



**Chuchuyimpang, Aug. 02, 2024 (TYO):** Chuchuyimpang yimdeni par yimdak Tsüngremmung sentong tulu ka ayongzük mungogo.

Iba sentong nung Nagaland Lok Sabha MP S. Süpongmeren Jamir tongti tesemdang liasü. Iba sentong nung kishikina yim balala den ano Mokokchung town nungi tanga Naga kintem aser Chuchuyimpang nunger bendang balala nungi lenla tabensa nungi jaoka kanga longsoa mungogo.

Supongmeren Jamiri iba sentong nung jembidang, pa lanuwa Fazl Ali College nung azüngdang aser talisa 1982 election nungi tenzükba politics nung ajemoker arudang, Chuchuyimpang nunger den tesentaktep kanga junga arudar, yamaji Chuchuyimpang nübertemia par senso dang nungi taliba meima aruba den tanüa pa nem maongka tulu agütsüba asoshi pelaba mezüngbuba metetdaksü.

nung tokolakpuri anir lenla tabensa nungi telok paika ya Chuchu lima adenshia iba amai Tsüngremmung meraketa aser longsoa mungtepba ya talisa nenok longjemba tamaitsü lir, anungji, ibai amajok mekümdaksütsüla, ta ashi.

Longjemba maparen dak sentakba nungbo "tama – tesü, aser "tuluba – tilaba" ta kodang tar asadanga onük tali jembidir meputepsa adener, anungji, aji mejembiba tajungba, kechiyong iba jagi puteptsü melena meputep ang tali dendaktsür, ta paisa tekümdangtsü olen ka ashi.

Tsüngremmung benjong ya pei taküm kibong merükteta amungba den Tsüngrem nem tenüngsang agüja aser yimertem putepsüba mapang ka, meranga inyaktsü azüngashiba den tongtibangsa tajung dangbo tajunga ta kadi ka tushiteptsü aser tashimait lira itemji metongshiteper aotsü asoshi paisa benjong tayongzükba ka agütsü.

mezüngpur ama asenoki meimtepa meliteter, kadi ka atema aria bilemba mali, adianu tsüngta temeim mali, lokti, kin aser yimer tsüngta temeim agi anünga lir. Nükmeremba, tiazü jembiba, ochi mashi item ya meintok tashi asenok kodanga tejakleni maotsü. Aria bilemba aser taitok agütsütepba item ya lokti ka tejakleni aotsü asoshi tongtibang nükmen lir, ta paisa metetdaksü.

Nisung shia nem Tsüngremmi sempet balala agüja lir, anungji, asenoki iba sempetji bushia metettsü merangtsüla, putu tensa den apet pei sempet shitak bushiteta amshitsü merangtsüla, kodang yamaji inyakdir, na atema dang masü saka nüber songjen atema temoatsü asütsü, ta paisa sentepa alirtem ayongzük. Koba mapa südir temlungjang temerük agi tajung bilema inyakdir yangji takok aser temoatsü lir, ta paisa shisem.

## Kidima nung AFS atema tenokdangba agiener

**Dimapur, August 2, 2024 (TYO):** Kidima yimtsüng aser temeket nung African Swine Fever (ASF) atema tenokdangba agüja aliba agiener ta Kohima Deputy Commissioner Kumar Ramnikant, IAS-i metetdaksüogo.

India sorkari latetja aliba ama ASF Control, Containment aser Eradication indang 'National Action Plan' nung aliba ama

Infected Zones aser Surveillance Zones nung ak atema tenokdangba agüja liasü saka ASF wara prokshiba osang kecha maliba atema agiener ta Kohima DC-i ashi.

Ajisüaka nübortemi hygiene aser bio- security measures sülen anidaktsüla aser ak shirangba mesüra asüba ajurura bangdakpur nem osang sangoktsüsü nenshir ta paisa ashi.

## Northeast ya 'first point of India' lir: DoNER Minister

**New Delhi, August 2, 2024 (Agencies):** Centre sorkari Northeast region nung temlung kanga agütsür ta DoNER Minister Jyotiraditya Scindia-i ashi.

August 1 nü Rajya Sabha session nung Manipur MP Leishemba Sanajaoba-i Northeast nung terenlok mapatongtem indang osang metetnua asüngdang "Prime Minister Narendra Modi-i tesüiba kü 10 tsünga Northeast ya 'the last point of India' nungi 'the first point of India' melentsüogo" ta Scindia-i langzü.

India putiotsü, sobaliba aser rongsenketzüng nung northeast

ya kanga tongtipang tesem ka kümogo ta paisa ashi.

Tesüiba küm 10 tsünga Northeast nung Rs 5.22 lakh crores endokogo aser iba ya taoba mapang Rs 5.15 lakh crores agütsüba dang nungi teimba liasü, ta DoNER Minister-i ashi.

Tesüiba küm 10 tsünga Northeast atema revised estimates Rs 27,539 crores nungi Rs 91,802 crores liasü. Kasa mapang actual expenditure 3.5 agi teimba liasü ta paisa metetdaksü.

India nüjiso ngur küm 75 süia arudang Northeast nem iba ama senotsü magütsüdang liasü ta Scindia-isa ashi.

Tanü MVC Capt. Imliakum Ao-i konang bener aruba nüngtem sepyo tulurtem, district

Tangari asenok dang ya "mezüngpur" ta ajar saka asenoki

Nokinketer MVC Imliakum Jamir, Chuchuyimpang village council chairman - Temsumoa Imsong, Chuchuyimpang Senso mungdang tir – Alemzungba aser ano Chuchuyimpang nunger bendang balala nungi adenshia lenir balalai shilem balala agia liasü. Telok balalai akhi tsürabur yimya nung sobaliba kentenmenü aser yartsüngsang balala ia sayudang benjong mungertem kanga longsetop.

# Longsa yimdak Tsungremmung mera keta mungogo



**Dimapur, Luroi/August 02 (TYO):** Mokochung district kübok Longsa yimdak Tsungremmung benjong August 2, 2024 nü amungba nung tongti tesemdanger ka ama Deputy Speaker, Nagaland Legislative Assembly, Toiho Yeptho-i benjong moaja liasü.

Iba benjongmung ya Longsa Village Council ajanga Department of Tourism, Nagaland tawabangba kübok ayongzüka munga liasü.

Tongti tesemdangeri Salang Lenden, Longsa nung iba benjongmung sentong nung jembidang, benjongbentsü ya asen teyanglur nungi temoatsü jazükba mapang ka lir, ta ashi.

Asen lokti nung tribalism shisatsü yagi tebilemsü ajak adokdaksür, anungji iba tashidak anema asenoki raratsüla, ta pai ashi.

Longsa ya Nagaland nung mezünpur yimtsüng ka lir, aser iba yimtsüng nungi nübur lenir aser bureaucrats jenti adoker, aser tarutsü putu nunga iba temoatsü maneni alitsü ta amanger, ta Dy. Speaker, Toiho Yeptho-i ashi.

Minister, RD and SIRD, Govt. of Nagaland, Metsubo Jamir-i iba sentong nung o tatsüka jembidang, temoatsü balala atema anogoshi tenüngsang agütsüba anogo lir, ta ashi.

Tenüngsang agütsüba linük kaji tesunep aser yimchijimjung nung alir, ta pai shisem.

Paisa kati ka nungi temeim aser temoatsü anguba kodanga mamadokli, ta ayongzüka liasü.

Iba sentong nung MLA Benei M. Lamthiu aser Ongpangkong Mungdang tir Lipokmeren Jamir natia o

tatsütsü jembia.

Sentong tetenzüklen arr atsütepba liasü, aser yangji tongti tesemdanger den Minister Metsubo Jamir, MLAs Benei M Lamthiu, Limaonen Chang aser Pongshi Phom, sorkar ketdangsür aser yimdaklir temi shilem agia liasü.

Rev. K. Supong, Pastor, Longsa Baptist Church ajanga sarasadema iba benjongmung tenzük aser Talichuba Tatar, Chairman, Longsa Village Council ajanga pela agizükba o jembia, Bendangwati Tatar ajanga Tsungremmung ratet ashi aser Temjensosang Tatar, Tourism Committee ajanga melezpüng o jembia liasü.

Iba sentong nung Longsa Watsü Telen ajanga Aluyimer ken aten aser telok balalai tsüngsang aser arr atsütepba nung shilem agia liasü.

# Tseminyu nung Tribal Artisan Empanelment Mila agiogo

**Dimapur, Luroi/August 02 (TYO):** District Administration Tseminyu, MARCOFED, NBHM, DUDA aser IIE den longjemer TRIFED Ministry of Tribal Affairs, Government of India-i August 1 nü Tseminyu Town hall nung Tribal Artisan Empanelment Mila (TAeM) ayongzüka agiogo.

Iba sentong nung SDO (C) Tseminyu, Kimciyile alakteta jaoker liasü. Sentong nung o

jembiba mapang lai, Ministry of Tribal Affairs kübok tribal Artisans tem jangja parnoki yangluba osettem jenjang tajungba kümdaktsütsü, training agütsütsü aser shishilembatsü atema maongka agütsüba den TRIFED ajanga parnok shishilemba ajungkettsü asoshi maongka agütsütsü atema parnok züngoksema libaliro jenjang ajungkettsütsü India sorkar nükjidong lir, ta

ashi.

Sentong nung Abhijeet Dutta, Marketing Head, TRIFED RO NER aser ST. Lamkhogin, Deputy Manager, TRIFED HO Delhi natia o tatsütsü jembia liasü.

Iba sentong ya Thehose Sangtam, Nodal Officer, MARCOFED lenisüba nung agi aser Senior Executive, IIE Sapulu Krocha-i tepela o jembia liasü.



Dimapur Ao Lanur Telongjemi parnok kimen kidang Indisen nung ayongzüka Tsüngremmung sentong nung Foothill Ao Lanur Telongjem-i amen ken atenba noksa nung angur. Iba sentong nung Ao Senso Telongjem Dimapur, Dimapur Watsü Telongjem, Ao Kaketshir Telongjem Dimapur aser Dimapur Zone Ao Officers' Telongjem nungi lenirtem den Ao lanurtem longsua dena liasü. (Dimapur, August 02, 2024).

# Ao Senso Telongjem Noklak Hon Jubilee mungogo



Hokulbarnü Multi Discipline Sports Stadium, Noklak nung Ao Senso Telongjem Noklak Hon Jubilee amungdang tangokba lokti noksa ka yangi angur.

**Dimapur, Luroi/August 02 (TYO):** Züroketa (Veneration) omen nung ajemdaker Ao Senso Telongjem Noklak Hon Jubilee mung sentong August 2, 2024 nü Multi Discipline Sports Stadium, Noklak nung anepdang 11:00 ako nungi agia liasü.

Iba sentong akümdong ya Ao Senden tir Marsanen Imsong liasü aser tongti o jembir Rev. Moatoshi, Pastor, Tuensang Town Ao Baptist Arogo liasü.

Sentong akumdong Marsanen-i Aor tebu ka ama iba sentong moatsü aser

oshioben aser libaliru nü indang ayak lir, ta pai ashi.

Tsürabortem tsüngnep nung tanü iba jubilee amunger, anungji parnok tsüngsü nung maneni jajatsüla, ta pai ashi.

Lokti nung nükmrem ajanga tashi mait adokdaksür aser ibaji ajanga dangar memenepi atsüngzüka aor, anungji jubilee tenüng nung teka amteper aotsü, kati ka akumtsüboa, yariteptsü aser lungjemshitsüla, ta Ao Senden tiri ayongzüka.

(Maneni tapak 8 nung...)

# Kargil rara dak sentakba sentong Chuchuyimpang yimtak akatsü: Brig. Vikram Singh



Chuchuyimpang yimtak Captain Imliakum Maha Vir Chakra nungtem nung Nokinketer Lungzüng azüngba sentong nung Tongti tesemdanger Lok Sabha MP Wb.S.Supongmeren Jamir, tetushi tejaoker DIG, HQ 7 Sector AR. Brig. Vikram Singh, Capt. Imliakum MVC aser lenir balala tangokba noksa.

**Mokokchung, August/Luroi 02(TYO):** India nungeri 1999 küm Kargil War tongpang raradang Chuchuyimpang senso rongnungi Imliakum-i takum tenla agüja tsükchir tepsettetba ajanga iba rara nung takok ngutetba nungtem nung Chuchuyimpang sensosangeri iba Nokinketer Lungzüng azüngba asoshi

Chuchuyimpang nübur ajak nem tenüngsang agütsürta Brehostibarnü Chuchuyimpang yimtak Captain Imliakum Maha Vir Chakra nungtem nung Nokinketer Lungzüng azüngba sentong nung tetushi tejaoker DIG, HQ 7 Sector AR. Brig. Vikram Singh-i jembidang ashi.

(Maneni tapak 8 nung...)

# BJP ketdangsür aika District Congress Committee Mokokchung nung aden

**Mokokchung, August/Luroi 02 (TYO):** District Congress Committee Office, Mokokchung nung tanü BJP Party toktsür Senior BJP Officials aika District Congress Committee, Mokokchung nung adentsü asoshi arur agizükba sentong ka kaogo.

Sentong nung Lok Sabha MP Wb.S.Supongmeren Jamir-

i mapang tatsüka agia jembidang asenok Congress party ya tangbo kanga dang tilaka ama lir, kechiba süra küm 21 tashi merandanga inyaka party metoktsüi aruogo, asenok tanubo kibong ka ama dang lir saka teimla mesamai telongjem nung tamang kaa takok angutsü asoshi inyaktsülata ashi.

(Maneni tapak 8 nung...)



August 02, 2024 nü Rashtrapati Bhavan nung anogo ananü Governor tem senden tetenzük sentong nung linük Tir Droupadi Murmu, tatong tir Jagdeep Dhankhar, Ato kilonser Narendra Modi, Union Home Minister Amit Shah, Union Ministers- Dharmendra Pradhan, Ashwini Vaishnaw, Mansukh L. Mandaviya aser National Security Advisor, Ajit Doval nung den state balala nungi Governor tem adenba noksa nung angur.

### Yaküm India nunger lakh 2.1-i linük senso agienadok: Centre

### Yaküm India nunger lakh 2.1-i linük senso agienadok: Centre

New Delhi, Luroi/August 01 (Agencies): 2023 küm India nunger 2,16,000-i senso agienadokogo, ta Brihostibarnü sorkari Rajya Sabha senden nung metetdaksü.

Minister of State for External Affairs, Kirti Vardhan Singh-i, "2023 küm India nunger 2,16,219-i senso agienogogo. Iba denji medemdangra 2022 küm India nunger 2,25,620-i senso agien, 2021 küm 1,63,370-i senso agien, 2020 küm 85,256-i senso agien aser 2019 küm India nunger 1,44,017-i senso agien," ta metetdaksü.

AAP züngsem, Raghav Chadha-i, India nunger aikati senso agienadokba kuli aser India senso akümtsü tenüng

agütsürtem kanga ajema agizükba kuli balala bushisüngdang asü? ta sorkar dang asüngdanga liasü.

Paisa, India nunger aikati senso agienba ajanga senotsü aser shishashir aika ajema akümba sorkari asadanger asü?, ta asüngdanga liasü.

Item tasüngdangba langzüdang MoS Vardhan Singh-i, senso agienba mesüra senso meshiba kulitemji nija tangatetba kuli balala ajanga lir, ta ashi.

Singh-isa, bendanglen sensotem takok ngua aliba, azükarua aser aika ajanzüküteta alibaji India atema senti, ibaji ajanga bendanglen sensotem networks tsütsü tajangzük angur, ta ashi.

### Centralised Grievance Redressal Management System (CGRMS), Central aser State call centres ajanga metetdaksütsü akok.

New Delhi, Luroi/August 02 (Agencies): Taküm June 30, 2024 anogo tashi nung Ayushman Bharat Pradhan Mantri Jan Arogya Yojana kübok hospital 29,000 dak tema empanel süogo aser iba nungji nija hospital 12,625 densema lir, ta Hokolbarnü Union Health Minister, JP Nadda-i Lok Sabha senden nung metetdaksü.

Empanel asüba hospital ajaki peipei State Health Agencies (SHAs) den MoU sign süogo.

Empanel süa aliba hospital temi treatment atema shirangertem magizükra mesüra iba scheme dak sendakba nung mangatetep kar danga adokra beneficiaries-i web-based portal

Centralised Grievance Redressal Management System (CGRMS), Central aser State call centres ajanga metetdaksütsü akok. Beneficiaries-i item ama hospital anema inyaksü asoshi State Health Agency nem metetdaksütsü akok.

Empanel süa aliba hospitals ajak nung temsüa aliba beneficiaries nem treatment agütsüsüla, ta Health Minister, Nadda-isa metetaksü.

Hospital ka kanga junga aobaji iba scheme kübok nisung aika nem treatment agütsüba ajanga jangjar, ta paisa metetdaksü. Uttar Pradesh nunga iba scheme kübok nija

hospital 2,634 aser sorkar hospital 2,948 empanel süogo aser Tamil Nadu nung nija hospital 1,202 aser sorkar hospital 996 empanel süogo.

Andhra Pradesh nung nija hospital 1,027 aser sorkar hospital 1,406, Gujarat nung nija hospital 868 aser sorkar hospital 1,747 aser Bihar nung nija hospital 564 aser sorkar hospital 2,968 empanel süogo, ta union minister-isa metetdaksü.

Delhi nung nija hospital 52 aser sorkar hospital 11, West Bengal nung nija hospital 10 aser sorkar hospital 27 aser Odisha nung nija hospital ka aser sorkar hospital 11 empanel süogo, ta Nadda-i metetdaksü.

### Congress MP Rahul Gandhi-i Wayanad nung ki 100 sütsütsü nangzük

New Delhi, August 02 (Agencies): Lok Sabha nung Opposition lenir aser Congress MP, Rahul Gandhi-i Kerala kübok Wayanad district nung anentsüh lendong agi kongshiba tesemtem nung party-i ki 100 sütsütsü, ta nangzükogo.

Wayanad district administration aser panchayat ajuruba sülen osangbenertem den jembidang

Rahul Gandhi-i, pai Delhi nung iba atemaji jembitsü, ta metetdaksü. Wayanad nung anentsüh lendong ya Kerala nung anentsüh lendong tulutiba asütsü, ta shia pai

Pinarayi Vijayan dang iba tensa ya khenyongi balaka züngshitsüla, ta mepishi.

Rahul Gandhi den Congress General Secretary, Priyanka Gandhi Vadra aser party nung tongti lenirtema kar liasü.

District ketdangsertem jagi anentsüh lendong nung nisung asüba, kiojen raksaba aser kümzükba maparen inyakba osang tejangja parnok nem metetdakja liasü.

Brihostibarnü Rahul Gandhi aser Priyanka Gandhi nati Wayanad nung anentsüh lendong atalokba tesemtem semdanga liasü.

Ano tanga osang ka nung,

Hokolbarnü Indian Army temi Wayanad nung anentsüh lendong atalokba tesem nung jana nungi nisung pezü (tetsür ana aser tebur ana) kümzükogo. Anentsüh lendong ya Mongolbarnep atalokba sülen anogo asemnübuba nung ang nisung pezüji Padavetti Kunnu nung kümzük.

Hokolbarnü Kerala Health Minister, Veena George-i, Wayanad nung atalokba anentsüh lendong nung tang tashi nung nisung 308 asüba jangjaogo; tang tashi nung tasü mang 195 aser temang shilem 113 bo ngutetogo, ta metetdaksü.

### India nung doctor-nütsüng ratio ji WHO telatetba dang nungi tajungba

New Delhi, Luroi/August 02 (Agencies): Tang India linük nung doctor-nütsüng ratio ji 1:836 lir (nisung 836 shia doctor kaka atar), aser ibaji World Health Organization (WHO) standard 1:1000 dang nungibo tajungba, ta Hokolbarnü Minister of State for Health, Anupriya Patel-i Lok Sabha senden nung metetdaksü.

Lok Sabha senden nung tasüngdangba ka langzüdang Union Minister, Patel-i, "National Medical Commission (NMC)-i agütsüba osang nung ajemdaker, 2024 küm July ita tashi nung State Medical Councils aser National Medical Commission (NMC) den register süa aliba allopathic doctor ajak senteper 13,86,136 lir," ta metetdaksü.

"Register süa aliba allopathic doctor tem shilem 80 service agidar aser AYUSH doctor lakh 5.65 lir, anungji tang linük nung doctor-nütsüng ratio ji 1:836 lir, aser ibaji WHO standard ratio 1:1000 dang nungibo tajungba," ta Patel-i metetdaksü.

Laisa, tang linük nung medical college 731 lir aser item medical colleges nung küm shia MBBS seat 1,12,112 adoker. Iba dak alia tang tashi nung PG seat 72,627 lir, ta metetdaksü.

Medical education facilities tajungba akümtsü aser medical standards tajungba akümtsü

asoshi sorkar sentong kübok medical college tasen amenoktsü asoshi Centrally Sponsored Scheme (CSS) ajanga district/referral hospitals upgrade sütsür. Iba kübok medical college tasen 157 agizükogo aser iba nungjagi medical college tasen 109 bo tenzükogo.

MBBS (UG) aser PG seats teimba akümtsü asoshi CSS kübok medical colleges upgrade sütsür.

Medical college 83 nung MBBS seats 4,977 bendenloktü atema sen crore 5,972 lemzüksüogogo aser college 72 nung mezüngbuba shilem kübok PG seats 4,058 atema sen crore 1,498.43 lemzüksüogogo. Shilem tanabuba kübok college 65 nung PG seat 4,000 atema sen crore 4,478 lemzüksüogogo, ta union minister-isa metetdaksü.

"Sorkar medical colleges upgrade sütsüba kübok Pradhan Mantri Swasthya Suraksha Yojana (PMSSY) ajanga super specialty blocks sütsür, project 75 agizükogo aser iba nungjagi project 66 bo renemogo," ta laisa metetdaksü.

Central Sector Scheme kübok AIIMS tasen 22 agizükogo aser iba nungjagi AIIMS 19 nungbo undergraduate courses tenzükadokogo, ta lai metetdaksü.



August 2, 2024 nü Rudraprayag nung tzunglu kanga aruba ajanga gari lenmang aika tzu agi ponger aoba sülen NDRF sepaitemi temeshi aini aoertem kümzükba noksa nung angur.



August 02, 2024 nü Wayanad district nung anentsüh lendong tulu atalokba tesem nung Army temi azü amshia tasü mang bushidang tangokba noksa nung angur.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ

LUROI 03, 2024

### Plastic teyari aser tebilemtsü

Tanü asüng shishidak asenoki kechisarina alibatem enoktsü asoshi plastic yangku, polythene bags, nungi shir tzü pongdang aser auso marok tashi plastic agi yangluba osettem amshir. Ibai asenok asoshi ayongra aser jenjanga tasakbo masü, Ano, shishilembadak dokan nung polythene bag-temjibo angati agütsür, anungji dokani aodang khu abentsü atema yangku abentsü nungdak madoker. Atangji, item plastic agi yangluba asenok anogo shia nungdakba osettem asen lima tonga arur küm aikabo masü. Aji oda, küm ishika jakdangbo asenok dokani jangotsü alii aodang itemji enoka abentsü atema kidang nungi yangku benersa ao. Ano, lokti chiyongba mapanga tzü aser süngo ajemtsü atema ani aser au süngküm agi taki aser marok yanglua amshi aser chiyongtsü atema amchi am amshi. Item ajakji asenok lushi arem nung angur, anungji mapa boluyonga senbo maor. Ajisüaka, tanübo tzü aser süngo ajemtsü asoshia lokti nung dang masü saka azümasener ki kar nungbo plastic agi yangluba marok aser tzü bottle tila amshiba angutsü. Item mapatemji senotsü oaka ayongayonger, kechiyong tzü aser süngo jemer marok shitoktsü nungdak madoker. Item mapatem nungji asenok joko yimya sübaadokogo, anungji plastic osettemji mamshiang asenok melitetsü. Atangji, tang plastic agi yangluba osettem melenaji kakat agia yanglua amshir saka plastic amabo masü, anungji nisungtemi plastic amshiba yimya endoktsübaji mapang agitsü. Iba ama plastic agidang taküm alir ama anogo shia nisungtem nungdak nung amshiba mapang ka, tan August ita nungi khen dang amshir endoktsüba plastic agi yangluba bottle, auso marok aser yangkutem Nagaland nung khenyongi mamshitsü ozüng agütsübaji mapa küma aotsübo mapang agitsü. Atangji, Nagaland nung item plastic agi yangluba osettem mamshitsü ozüng agütsübaji tang tasen masü saka akhidanga agütsür liasü saka Covid aruba ajanga item ozüngtemji karbo mapa küma mamshitetsüsa aküm, anungji akhidang plastic mamshitsü ozüng agüja aliba agien masü saka government-i mapa küma mienyaktetba agi kasa ozüng agütsüshir dang lir. Iba ama nübortem nungdak nung anogo shia amshia aliba oset ka mamshitsü ozüng agütsübaji mapa küma inyaksü atema tangatetba agütsütsü nungdaker, kechiyong nisungtemi mangatetra senchi achiyonga odang amshitsü. Ajisüaka, angatetra ozüng magütsüyonga mamshitsü. Aji oda, plastic ya asenok atema tamshisü tajung asüyonga, asenoki amshir mashimashi endokba agi alijak nung ali, tzü aser ayonga menendaktsür. Aji oda, nisung million ta aliba yimti ka nung anogo shia khen jemer endoktsüba tzü bottle tila nisung lakh anasemkati alia jemer mashi nung endokra mesüra nisung meyririjang aika chiyongba lokti benjong ka nung amshiba plastic auso aser marok aser tzü bottle tilatemji aremlen mesüra ayong mashi ka nung endokra, iba jagi alijak tuluka aia memeyitsüsa nembangtsü aser ayongtem nungi tenzüka tzüim tashi plastic agi asüngtsü. Kasaji, asenok nütsüng ishika dang aliba yimitem nunga anogo shia asenoki yimti yimdong nung asenoki achiba amtsük aser nanglong alepba plastic tilala aser dokan nung jangotsü aser aonsutsü seper agütsüba polythene bag-tem amshir mashimashi nung endoka jajaba agi alima ajak plastic agi asünger aser itemji yipru mopung aser motzü agi aremlen aser ayonglangleni bener senshir. Tanü arem aser ayong nung taküm sangnu aser ango akong samaba aser tzü mopung menena akümba kulitem rongnung kaji asenoki mebilemdangi asenoki amshiba plastic osettem mashimashi nung endokba nungi tenzüka tebilemtsütem lir. Atangji, asenoki angateta jungjunga amshidi süra, asenoki amshiba plastic-temji tanaben menünger ano tanga osettema yanglutetsü. Itemji angateta, plastic mamshitsüba ozüngji teti atema mesüi nisungtem tangatetba ka dangi maru tashi benschia ali nung junger. Aji oda, angatetra, maparen aika nung plastic-sa tajunga asünungji, plastic osettem agi alima memenentsüsa amshi sayutsübajiang tongtibangba asütsü.

# OLEMSABANG

## Tsüngrem Mong

I. Shilu Jamir, Dimapur.

(Yashi adok nungi...)

1. Ida kazü ken : Ida Ida, na shir Ida? Nokdensanger Ida, Nokdensangi sü scü teploktsükoma? Ajongkonger talep ka, yajem naro talep ka, Oh Idala Idala  
Mapu tulangso, Züngyi tulong so  
Ozü Ida tajungla dak  
Oh mepet tesuloktsü nao oa...
2. Tebur : Kü züngatsü kolangbo metsü mesülep takata  
Tetsür : Oh, Züngapur nü kopang tsütokmar  
Ozü kolang majongyangbo temenütsüma
3. Tebur : Kü züngatsü hakhaknüle  
Oh ak ru agi shishi alia chimala  
Tetsür : Oh, Züngapur, shi tajung maka nungji  
Tashi kajia junga chir na?
4. Mongpo Yongya Ken : Oh takümi kirümpang süngtsüng...  
Lungmi yongyanga atudarni  
Oh, taküm tsüngküm mongpo...  
Ano temenu masü or teyongya ni.
5. Kü züngatsü Aori keyi monüle, tsümar keyi onüle.  
Oh, züngapur tsümar malir  
Ao chuba tajungji asüngdangma.

Nikongtsütsü nungi Putu yimsüsür ki maka jajatsü iba yati anogo (Tenti anogo) taka taiter ajaki pei kilir jenlir ajak nem süoshi tasen sobotsür chiyongtsü tajung chiyongdaktsür pelatepa telok den arua benjongdaktsür. Yamaji benjongmong nungtem yimya awashi tajung benschiba jagi teyanglur Tsüngrem pelar aser Tsüngrem Mong benjong tetezü abensatsür ta aser teyar-i nubur moatsür ta amanga züngshia arur.

Joko nikongdang mepu sasep asangurtemi süzüng züji tazünglen aam 3 shi alangzüka lepzüker anüka ajensaa shisar teburtem ajaki iba nungji teka keleni amettsü aser teka külen medemer tapupang nung awaloka nokdakteper langtsüngshi luli atuli ta atsüshiteptsü. Shizüngzü teküpoklenji tetsür ajaki ameter atsüshitepa longsopepa alidang Arju nunger lungmi milenpong tsükloka bener yimdong ajak yapanga sangwadakja tobur junga sobutsü tabensa sobur milentsüng nungji arudang teburtemi aok atena arü adena mepu tatem kelen nungi kelen tashi tsüngsanga jajatsü. Tetsürtema parnoktsütsü serem sü agi ajak teku ajena sobur arr ken, ajongdong ken tena awang atena teburtem den jaja longsopepa pelatepa benjongteptsü.

Yamaji jajadang ken kenbo tobur o tetsür na tashi toktepa shizüngzü atsütep dang tetsürtemi oa tesülen nungi tebur dak keliletsü idangji oda tetsürtemi atsür aor idangji tebur temi makok ta maksüdakja menütepa longsopeper yamaji jilu balala yitepa Tsüngrem Mong benjong moatsür. Iba sülen Tsüngrem Mong benjong tatem aonung joko tetsürtembo pei pei züki (Tsüki) oa atadang teburtembo ammag piyong oda mesangwa tashi ki makaa chia jema tedong nungertem semdanga ajurua longsopepa jajatsü aji oda pelatepa benjong shizüka menungrasetta tembanger.

14. Aoer Tsüngrem Mong benjong mapang anempong yamai, semki nung tsük masentsü, shizüng aser aam matongtsü, süngkong aser assüm (drum) matemtsü, tsüngtsüng matemtsü, ozümi masungtsü, itemji benschia inyakra Lijaba mepelar aser tsük aponger ta takzü-a benschia aru.
15. Benjong tempanger kelen 4 nübuba anepdangji Longkitsüngba süngsem alenloka alibatemji agizüka endoker anempong atemtsü aser anogo 4 nü buba nüji aien lemag aser kiyonger yimtem den sendaktepa aliba lemag ajak nübu zünga lemsar len apitsü, Iba ain lenbi nung Arju nunger nem a len palaka lemsüka pidaktsür.
16. Panüjibo iba küm kibong tasen akümertemi shi aontem aser amitsür temi lontem renema bentsür. Chiyong temer külen sobaliba ken tena aser o-tem jembia aser lanurtem rongnung nokchira sayutepba benjong medem pelateper.
17. Iba sülen mapa ajak temer kelen tsüngpo yar terokben (6 times) oli aruli ta yarir kelen ano terok ben ok atentsü ajiser meyua yimdaki adoktsü aser paonungji parnok ajak takar ki maaka yi aser shi anünga aliba ajak chia jemtepa pelatepa tempangtsü koba dang Yisang alok ta ajar. Yamaji küm shi August ita 1-3 amongba Aoer benjong tuluba Tsüngrem Mong mongtepa otsü tongmelang agi lemsateper.

Tulusang Tsüngremi Tsüngrem Monger nübur moajang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Takutet

(adj) temeteter, tajangshir, mongin ( expert, well matured and experienced)

\* Naga yimten lenitsü atema takutet nisung nüngdaker.

Takutsüing

(adj) anema apusoba, tamajung atsüingdoktsü merangba (revolt)

\* Tanü yimten nung ochimashi agientsü atema takutsüing mapang ka tenzüksüla.

OLONG PAITEP # 6864

Grid for OLONG PAITEP # 6864 with numbers 1-15 in various cells.

TIPIEN :

- 1. Ajemalua mepishiba - 10
4. Temezüngi kongshi - 4
5. Ainer - 6
7. Chiyungnü - 3
8. Mi nung atsük - 5
11. Asen masü - 3
13. Lenmang ajurutepdak - 6
14. Yangi masü - 4
15. Tekolok - 10

LANGTSÜNGLEN :

- 1. Menungra - 6
2. Mi tsükloker mesebba - 4
3. Süngo o tzü ajemba - 5
5. Temenemsü tajung - 7
6. Tema - 4
8. - ok - 4
9. Tezü aketba shiruru - 4
10. Tashi indokba metet - 5

OLONG PAITEP # 6863 TELANGZÜBA


TIPIEN :

- 1. Aben, 4. Artsü, 7. Lisem,
8. Liwa, 9. Sarasadem,
12. Aket, 14. Mangu, 15. Anünü,
16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Sүjak, 10. Aonung,
11. Dokan, 13. Tinu.

NAI-A YA METETTER MA



Pune nungi arishi küm 4 tain Radha Nagarkar-i 'backward roller skating' atema world record ka yangluogo. Iba otsü ya Guinness Book of World Records ajanga jangjatsüogo. May 27-31 tashi Shivganga Roller Skating Club, Belgaum ajanga 75-hour, 100-meter backward skating sentong ka ayonga agidang Radha-i otsü tasen yangluteta liasü. Radha arishi küm 3 ser tesadang nungi Rock On Wheel Academy nung roller skating angazüka aru aser coach Vijay Malji lenisüba kübok takok aika ngutetogo. Tesüiba ita trok tsüingda Radha-i tetoktepba balala nung medals 15 (gold 9 aser silver 6) ngutetogo.

Myanmar arrtsülen landmines ajanga yimdaklir aika süogo

Imphal, August 2, 2024

(Agencies): Manipur-Myanmar arrtsülen landmine aika apokba ajanga yimdaklir taküm aika samaogo aser iba atema state sorkar dang teinyaktsü kar inyaktsü rongshir.

Iba onük ya Hokolbarnü Kamjong district nung MLA Leishiyö Keishing-i Manipur Assembly nung benok aser idangji arrtsülen alirtem tetsüba tia nung aliba ashi.

Myanmar telungpurtemi pillars 91 aser 94 tsüingda landmines aika rema lir aser itemji apokba ajanga nisung takümtem samaogo aser yirur ta MLA Keishing-i ashi.

July 26 nü tetsür kaketshir ana landmine apokdang asü aser July 16 nü Rongmei Naga nunger ka pokset aser ka yiru. Taküm May ita nung dang landmine ana apok, ka Namlee yimtsüing aser ka Z Choro yimtsüing anasa apok, ta MLA Keishing-isa ashi.

Chief Minister N. Biren Singh-i iba tensa atema süoki

ia bilemba ashi aser Assam Rifles, Manipur police o intelligence ktdangsurtem joint survey team kati landmines bushia raksa endoktsü metetdaktüsü.

Iba survey osang ya Prime Minister aser External Affairs Minister dangi abentsü aser parnoki Myanmar ktdangsurtem den külemi mapa inyaktsü ta CM Biren-i ashi.

Arrtsülen landmine khuret ya Centre sorkar den lemsateptsü ta Chief Minister-isa nangzük.

Küm 22 sülen Gauhati Medical College And Hospital nung jenjang atur

Guwahati, August 2, 2024

(Agencies): Gauhati Medical College and Hospital (GMCH)-i clinical tests 107 indang jenjang tuogo aser iba ajanga jenjang dalang agi healthcare bushirtem dak kongshitsü.

Gauhati Medical College and Hospital nung küm 22 lir jenjang reprangshiogo. "Jenjangtem market prices nung ajemdaker atutsüsa akümer, ajisüaka jenjang tasenji nija mozükitem dang nungi tajemba lir" ta GMCH Superintendent Dr. Abhijit Sarma-i ashi.

GMCH nung jenjang atubaji registration fees aser bed charges 100% atuba lir. Tesüiba nung Rs 10 aliba tang Rs 20 kümogo. Maneni, biochemistry tests nung 20% aser thyroid, D-Dimer o folate amala test nung jenjang terara atutsü.

GMCH ya jenjang dalang agi healthcare services tajung agütsüba atema tetshir saka jenjang atuba ajanga shirangertem marutsü akok ta bilemer.

Assam ajungalen nungi shirangertem iba mozü ki bushia arur aser parnok 85% tashi Ayushman card holders lir aser PMJAY scheme kübok angati temang anepalur.

GMCH nung dang masü saka Assam kübok sorkar mozü kitem nung tarutsü anogotem jenjang atutsü imlar aser iba ajanga sensakertemi jenjang dalang agi healthcare bushiba atema timtem agütsütsü akok.

Mizoram CM Lalduhoma-i Manipur semdangtsü akok

Aizawl, August 2, 2024

(Agencies): Mizoram chief minister Lalduhoma-i Manipur chief minister N. Biren Singh semdangtsü atema Imphal semdangtsü akok.

Lalduhoma-i Biren den Meitei aser Kuki-Zo nunger tsüingda rara atema jembitsü ta Hokolbarnü sorkar sangdong ka ajanga ashi.

August 1, 2024 nü Lalduhoma-i Union Home Minister Amit Shah den New Delhi nung senden ka amendang Biren-i pa Imphal-i jaokogo aser pai ibaji mulunga agizüker ta ashi.

Manipur chief minister Biren Singh-i ni Imphal-i arutsü jaok. Ni iba temepishiba agizüktsü mulunga lir" ta Laldhuoma-i Shah dang ashi.

July 28 nü New Delhi nung NITI Aayog senden amenba mapang Biren-i Lalduhoma jaok ta osang angazüker.

Kuki nungeri Mizo nunger den sendaktepa lir aser parnok aikati Mizoram CM ya parnok tanishir ama züngshir, iba jagi Biren-i Lalduhoma jaok asütsü akok.

Lalduhoma-isa Shah dang Home Ministry aser Indigenous Tribal Leaders' Forum (ITLF), Churachandpur teshimtet nübotem tsüingda olemtep tenzüksü tebilemba ka shidanga liasü.

Hombarnü Kuki-Hmar-Mizo-Zomi nunger teloktemi 'Kuki-Zo Council' kübok common political platform ka tentetogo. Iba ya tarutsü nung Kuki-Zo nungeri Centre den olemtep alitsü atema tentet.

August 7 nü committee ajunga aser nükjidong indang osang metetdaktüsü ta Kuki nunger lennir kati ashi.

Kuki-Zo teloktem, Kuki MLA 10 aser sorkar den suspension of operation nung aliba Kuki telungpur teloktemi Union territory meshir. Mangatettep anentsü atema Union territory legislature (Pondicherry model) ama tentettsü parnoki takhangba agütsür.

Ajisüaka Meitei nunger teloktemi iba temepishiba magizüker aser Myanmar nungi ozüing alema aruba Kuki-Zo nunger jangjatsü atema Assam ama National Register of Citizens (NRC) ka renemtsü akhangter.

Yaküm May ita nungi Manipur nung kin o kin tsüingda rara adoker nisung 226 taküm samaogo ta CM Biren-i Bodbarnü assembly nung metetdaktüsügo. Paisa nisung 39 samar bushiteper aser nisung 59,000 tema relief camps nung lir ta ashi.

Iba mapang ki 11,133 rongdoktsü aser 4,569 raksatsüogo ta CM Biren Singh-isa ashi.



Sikkim transportation network nung Sarathis (drivers) ajanga tongtipang shilem agiba ajiteta Chief Minister Prem Singh Tamang-Golay-i Sarathi Samman Diwas nung driver tem asoshi maparen aika tenzüksügo. Chief Minister Golay-i Pollution Under Control (PUC) certificate maliba atema senchi Rs 10,000 nungi Rs 500 ajemtsüogo aser Sarathi Welfare Board ajanga driver tem asoshi insurance policies lapoktsütsü. Sikkim sorkarisa Sikkim Cab App tenzüksü aser iba ya driver temi asen aazüktsü maongka angutsü atema online taxi booking sabang ka lir. Sarathi Samman Diwas nungsa West Bengal den Reciprocal Transport Agreement ka agiba osang metetdaktüsü aser iba ajanga Sikkim nungi taxi gari quota teimba akümtsü.



